

Fa pauc, dins mon vilatge, le comitat de las fèstas convidèc le grop « Nadau » per un concèrt. I anguèri. Mas èri pas soleta, dins la sala i aviá un milierat de personas o benlèu mai. Alara quand ensagi de comparar amb la participacion de las gents a las activitats que prepausa l'IEO d'Arièja, me venon questions. Tota aquela molonada que ven escotar « Nadau » an una mena d'interès, de tendresa, d'estacament per l'occitan, es evident. Alara cossí es possible qu'ajan pas que mesprètz o al mens indiferéncia per tot çò d'autre que se fa, en occitan, dins le departament? Per ara, degun a pas cap de responsa a aquela question. Mas se la tòca de l'IEO es de tornar socializar la lenga nòstra, i va caler respondre lèu lèu e ensajar de trapar solucions amassa. Perqué Nadau acampa centenats de personas e perqué nosautres capitem pas de recampar monde en defòra d'un punhat d'aderents qu'an ja consciéncia de son occitanitat? Plan segur nosautres fasèm quicòm mai que le laus de la fèsta, mas caldriá benlèu que partiguèssem d'aquel gost del monde per las cançons e la fèsta, en occitan, pròva qu'an consciéncia de sa cultura, per anar cap a mai d'investment de sa part ; cossí fèr per virar aquel ligam teunhe que demòra dins le pòble, en engatjament militant dins la batèsta per salvar la lenga?

Per avançar, nos cal partir de la realitat, es a dire de la situacion que coneissèm, ont la lenga non se parla pas pus, siá dins la familha, siá dins la societat, ont la volontat a pena amagada de l'autoritat publica es de nos escafar -sufis de gaitar las subvencions que nos autrejan, que semblan caritats- ont las gents de per carrièra senton pas ni enveja ni besonh de parlar occitan, ont s'ausisson encara e totjorn totes les poncius contra la lenga nòstra e n'oblidi, de segur. Tot aquò es pas plan optimista mas es sus aquel terren qu'avèm de bastir.

Cresi que serà plan malaisit de far tornar la lenga per carrièra, de çò que vesi dins Arièja, las gents que venon als corses que prepausam, parlan pas occitan en defòra del cors, e encara... Dins sa vida vidanta, tot se passa en francés.

Sabi pas se tornarem jamai a una societat que s'i parlarà occitan. Ja dins las activitats de l'IEO d'Arièja ne sèm a nos demandar se caldriá pas far amb un pauc de francés per far venir monde novèl ! Per tornar préner l'exemple de la debuta, es çò que fa Nadau, que passa mai de temps a parlar francés per revirar sos tèxtes, qu'a cantar en occitan.

Dins Arièja, podèm pas esperar res del departament e pauc de las comunas.

Per contra, çò possible es de nos far véser sovent, dins totes las manifestacions publicas ont intervenon las associacions, multiplicar les partenariats amb d'autres associacions, que fagan per l'occitan o pas.

Ai plan consciéncia que nòstras fòrças son fragilas mas per tant malauta que siá, la lenga es pas mòrta, e tant que i a de vida...

**Annia Wolf**